



KENYATAAN MEDIA JABATAN ALAM SEKITAR

LAPORAN STATUS KUALITI UDARA DAN JEREBU DALAM NEGARA

Jabatan Alam Sekitar (JAS) mengambil maklum pengisytiharan darurat di seluruh Bahagian Serian, Sarawak berikutan keadaan jerebu yang telah mencapai tahap pencemaran udara yang membahayakan kesihatan dan keselamatan orang ramai. Pengisytiharan tersebut telah diperkenankan oleh Kebawah Duli Yang Maha Mulia Seri Paduka Baginda Yang di-Pertuan Agong setelah mengambil kira nasihat YAB Perdana Menteri, YAB Premier Sarawak serta agensi-agensi berkaitan.

JAS memandang serius perkembangan kualiti udara semasa dan terus memperkukuh pemantauan serta tindakan di lapangan selaras dengan Pelan Tindakan Jerebu Kebangsaan (PTJK) dan Arahan NADMA No. 1: Dasar dan Mekanisme Pengurusan Bencana Negara.

Indeks Pencemar Udara (IPU) yang direkodkan di laman sesawang Jabatan Alam Sekitar pada jam **10 malam** ini menunjukkan dua belas (12) kawasan mencatatkan status kualiti udara pada tahap baik, tiga puluh empat (34) kawasan mencatatkan status kualiti udara pada tahap sederhana, **lapan belas (18) kawasan mencatatkan bacaan IPU pada tahap tidak sihat, tiga (3) kawasan mencatatkan bacaan IPU pada tahap sangat tidak sihat, dan satu (1) kawasan mencatatkan bacaan IPU pada tahap berbahaya pada hari ini, iaitu:**

BERBAHAYA

- 1. IPD Serian, SARAWAK (IPU - 477)**

SANGAT TIDAK SIHAT

- 1. Kuching, SARAWAK (IPU - 299)**
- 2. Samarahan, SARAWAK (IPU - 286)**
- 3. Sri Aman, SARAWAK (IPU - 247)**

TIDAK SIHAT

- 1. Sibu, SARAWAK (IPU - 182)**
- 2. Sarikei, SARAWAK (IPU - 182)**
- 3. Mukah, SARAWAK (IPU - 180)**
- 4. Bintulu, SARAWAK (IPU - 171)**
- 5. Samalaju, SARAWAK (IPU - 168)**
- 6. ILP Miri, SARAWAK (IPU - 164)**
- 7. Pasir Gudang, JOHOR (IPU - 156)**
- 8. Miri, SARAWAK (IPU - 159)**
- 9. Larkin, JOHOR (IPU - 155)**
- 10. Kota Tinggi, JOHOR (IPU - 154)**
- 11. Tawau, SABAH (IPU - 153)**
- 12. Labuan, W.P. LABUAN (IPU - 129)**
- 13. Limbang, SARAWAK (IPU - 106)**
- 14. Politeknik Kota Kinabalu, SABAH (IPU - 152)**
- 15. Pengerang, JOHOR (IPU - 147)**
- 16. Segamat, JOHOR (IPU - 112)**
- 17. Kluang, JOHOR (IPU - 108)**
- 18. Sandakan, SABAH (IPU - 108)**

Berdasarkan rekod pemantauan JAS pada jam 10.00 malam, 4 September 2026, sebanyak satu (1) kawasan mencatatkan bacaan IPU pada tahap berbahaya, iaitu IPD Serian, Sarawak dengan bacaan (IPU 477). Tiga (3) kawasan lagi, iaitu Kuching (IPU 299), Samarahan (IPU 286) dan Sri Aman (IPU 247), mencatatkan bacaan pada tahap sangat tidak sihat. Beberapa kawasan lain di Sarawak turut merekodkan bacaan pada tahap tidak sihat.

Keadaan ini berlaku dalam persekitaran cuaca kering yang berterusan di sebahagian Rantau Selatan ASEAN. Berdasarkan laporan ASEAN Specialised Meteorological

Centre (ASMC) pada 4 September 2026, sebanyak 139 titik panas dikesan di Kalimantan, 138 di Sumatera dan 16 titik panas di Malaysia, iaitu 5 di Sabah, 9 di Sarawak dan 2 di Terengganu. ASMC turut melaporkan jerebu sederhana hingga tebal diperhatikan bergerak ke arah timur laut dari Kalimantan ke beberapa kawasan di Sarawak, Sabah dan Brunei. Kepulan asap sederhana hingga tebal turut diperhatikan di Kalimantan Utara dan Kalimantan Timur serta bahagian tengah dan selatan Sumatera. Jerebu sederhana turut diperhatikan di Singapura, bahagian selatan Semenanjung Malaysia dan bahagian timur Jawa.

Dalam konteks ini, JAS ingin menegaskan bahawa bidang kuasa dan tanggungjawab JAS adalah kepada pemantauan kualiti alam sekitar, pencegahan dan penguatkuasaan terhadap pembakaran terbuka serta sumber pencemaran yang tertakluk di bawah peruntukan undang-undang alam sekitar. Pengurusan bencana secara keseluruhan pula dilaksanakan secara bersepadu bersama NADMA, kerajaan negeri dan agensi-agensi berkaitan mengikut peranan, fungsi dan bidang kuasa masing-masing.

TINDAKAN JAS DIPERKUKUH

JAS Negeri Sarawak terus melaksanakan Operasi Mencegah Pembakaran Terbuka (OMPT), rondaan, pemantauan dan tindakan penguatkuasaan, khususnya di kawasan yang dikenal pasti berisiko berlaku pembakaran terbuka.

Pemantauan dan rondaan akan dipertingkatkan di kawasan berisiko termasuk hutan, tanah gambut, tapak pelupusan sampah, kawasan pertanian dan perladangan, kawasan industri serta lokasi lain yang berpotensi menjadi punca pembakaran terbuka. Sebarang sumber pembakaran terbuka atau pencemaran yang dikenal pasti akan disiasat dan tindakan penguatkuasaan akan diambil dengan tegas mengikut peruntukan undang-undang serta bidang kuasa JAS.

JAS turut memberi perhatian terhadap kejadian kebakaran yang dilaporkan berlaku di kawasan belukar tanah gambut berhampiran Jalan Sibujaya Barat, Mukah, Sarawak yang melibatkan keluasan kira-kira 10 hektar, serta di Sungai Nai, Daro, Mukah, Sarawak dengan keluasan kira-kira 3 hektar. Dalam keadaan cuaca panas dan kering,

kawasan vegetasi dan tanah gambut berada pada risiko yang lebih tinggi untuk berlaku kebakaran kerana keadaan persekitaran yang lebih kering dan mudah terbakar.

Sehubungan itu, JAS Sarawak sedang memantau perkembangan kebakaran di kedua-dua lokasi berkenaan dan akan melaksanakan penerbangan dron bagi mendapatkan gambaran terkini mengenai status kebakaran serta kawasan yang terjejas. Pemantauan dan tindakan susulan akan dilaksanakan berdasarkan keadaan sebenar di lapangan serta hasil siasatan JAS bersama agensi berkaitan.

Pada masa yang sama, JAS akan terus memantau bacaan IPU, titik panas, keadaan meteorologi dan perkembangan jerebu rentas sempadan sebagai input kepada penilaian situasi dan penyelarasan tindakan pengurusan jerebu di peringkat daerah, negeri dan kebangsaan.

JAS juga menegaskan bahawa pihak industri hendaklah memastikan pelepasan udara daripada punca utama dikurangkan bagi kawasan yang mencatatkan bacaan IPU melebihi 300, selaras dengan keperluan kawalan pencemaran dan tanggungjawab pihak industri dalam membantu mengurangkan tekanan terhadap kualiti udara.

TINDAKAN SELARAS PTJK

Tindakan JAS dilaksanakan secara bersepadu selaras dengan PTJK yang menetapkan peranan pelbagai agensi berdasarkan tahap dan perkembangan situasi jerebu. Antara mekanisme yang digariskan ialah pengaktifan Jawatankuasa Pengurusan Bencana oleh NADMA apabila:

- bacaan IPU melebihi 150 selama lebih 24 jam;
- penghentian aktiviti luar bilik darjah apabila IPU melebihi 100;
- penutupan sekolah, tadika dan taska apabila IPU melebihi 200; dan
- pelaksanaan Operasi Pembenihan Awan tertakluk kepada kehadiran awan dan keadaan cuaca yang sesuai apabila bacaan IPU melebihi 150 selama lebih 24 jam.

JAS akan terus mengemukakan maklumat berkaitan perkembangan situasi, hasil pemantauan, rondaan, OMPT dan tindakan penguatkuasaan secara berkala mengikut mekanisme pelaporan yang ditetapkan. Ini bagi memastikan perkembangan situasi dapat dinilai secara berterusan dan tindakan sewajarnya dapat diselaraskan di semua peringkat.

Dalam keadaan semasa, JAS tidak akan berkompromi terhadap sebarang pembakaran terbuka yang dikenal pasti berpunca daripada aktiviti manusia, khususnya sekiranya aktiviti tersebut menyumbang kepada kemerosotan kualiti udara. Tindakan pencegahan, pemeriksaan, siasatan dan penguatkuasaan akan diteruskan berdasarkan bukti serta bidang kuasa yang diperuntukkan kepada JAS.

ORANG RAMAI DIMINTA BEKERJASAMA

JAS menyeru orang ramai supaya tidak melakukan pembakaran terbuka, khususnya ketika keadaan cuaca panas dan kering serta kualiti udara berada pada tahap yang tidak sihat hingga berbahaya.

Orang ramai juga diminta supaya tidak membenarkan tanah atau premis milik mereka dimasuki atau dicerobohi oleh pihak yang tidak bertanggungjawab sehingga menyebabkan berlakunya pembakaran terbuka.

Selaras dengan Akta Kualiti Alam Sekeliling (Pindaan) 2024, kesalahan pembakaran terbuka boleh dikenakan denda minimum RM25,000 hingga RM1,000,000, atau penjara sehingga lima tahun, atau kedua-duanya. Kompaun sehingga 50 peratus daripada denda maksimum juga boleh dikenakan bagi setiap kesalahan.

Orang ramai diminta segera melaporkan sebarang kejadian kebakaran atau pembakaran terbuka kepada Jabatan Bomba dan Penyelamat Malaysia melalui talian 999 atau JAS melalui talian bebas tol 1-800-88-2727 bagi membolehkan tindakan segera diambil.

Bacaan IPU terkini setiap jam boleh dirujuk melalui Sistem Pengurusan Indeks Pencemar Udara (APIMS) JAS atau aplikasi rasmi MyJAS EQMS. Orang ramai juga dinasihatkan supaya mengikuti arahan dan nasihat kesihatan yang dikeluarkan oleh Kementerian Kesihatan Malaysia.

JAS akan terus memantau, menilai dan bertindak berdasarkan perkembangan kualiti udara serta keadaan jerebu semasa, di samping memperkukuh kerjasama dengan NADMA dan semua agensi berkaitan bagi memastikan tindakan menangani jerebu dilaksanakan secara pantas, terselaras dan berkesan.

HAJAH AZURI AZIZAH BINTI HAJI SAEDON
TIMBALAN KETUA PENGARAH (PEMBANGUNAN)
4 SEPTEMBER 2026



Unit Komunikasi Korporat | Jabatan Alam Sekitar (JAS)
Tel. : 03-8000 8000 | Faks : 03-8889 47

RAJAH 1

Peta Jerebu Serantau Yang Dikeluarkan Oleh ASMC Pada 4 September 2026

